

# ألوان

أشعار بالعامية المصرية

للشاعر / محمد رجب

إلى روح أمي وقلب أبي  
و حب زوجتي و صفاء أولادي  
و وفاء أصحابي  
اهدي هذا العمل  
مع خالص حبي و تقديري  
لكل قارئ ..  
و مهتم ومحب  
لمصرنا الحبيبة

الشاعر / محمد رجب

بہارِ

بحبك ..  
يا أجمل ملامح وجودي  
بحبك ..  
وحبك ميراثي وأساسي ..  
وأهلي وناسي..  
أبويا وجدودي  
بحبك ..  
مآذن بتعلّى وتعلّى..  
بصوت الأذان  
وجندي في ميدان ..  
بيفدى بدمه ..  
ولا شئ يهمه ..  
وكله إيمان  
بحبك خضار..  
وقلبك عمار ..  
يملاني ديما ..  
بنور النهار  
بحبك يا بلدي ..  
ومالي اختيار  
بحبك ..  
مصانع وصانع صبور ..  
بيعشق مكنّته ..

(١٣)

ويغزل ف توبك ..  
ويكتب حكايته ..  
ويفرش دروبك ..  
محبه ونور  
وأحبك ..  
مكافح ..  
وعالم طيب ..  
مذاكر دروسه وفاهم لبيب  
وأحبك ..  
مزارع وزارع ح قول ..  
نخيلك ونيلك ..  
وقمحك وفول  
بيزرع في أرضك ..  
ويتمنى سعدك ..  
ونيلك وسدك ..  
قالوا له يقولك  
بـحبك بحبك

(١٤)

## تعريف

طول عمري عاشق ..  
طمي نيلي الأسمراني  
وخداني مني نخلتي ..  
ومحبتني ..

لأهلي وجيراني  
طول عمري سابق بالخطاوي ..  
الخضر موال الغناوي  
فلاح لكن فنان ..  
وعاشق تربتي ..  
وفي سكتي ..  
ديماً بالآقي الخير ..  
بيملا في الغيطان ..  
معروف ..

ويشهد لي الزمان ..  
ساعة حصاد الزرع ..  
وأنا بجني في المحاصيل  
عارف بآنى الفرع ..  
من شجرة ..  
ابن النيل

مانا ابن مصر الطيبة ..  
أم الرجال العرقانين  
حاضنين مكانهم ..

وفي مكانهم ..  
دقوا الكفوف ..  
على صوت مصانع عزهم..  
وبجهدهم ..  
عدت بلدنا الخطوة فوق كل الظروف  
عمال وشايلين ..  
على أكتافهم آمال  
وان مال زمانهم ..  
عزمهم قد الجبال  
أنا ابن مصر ..  
ومهنتي عامل  
لسايا شايل ..  
فوق كتافي الحمل  
وباغني على صوت المكن..  
موال  
بحب بلدي ..  
وبعشق صوت لفة المواتير  
وأغير لو شفت أخويا بيلبس..  
من صناعة الغير  
م أنا ابن مصر الطيبة ..  
أم الولاد الطيبين



# حتت بتاعة

أنا أصلي تحت بتاعة..  
بأحلم باني جرى  
راكب حصان الشجاعة..  
فاتح لروحي الطريق  
وسط الغيطان ماشي..  
والنيل على يميني  
وف أيدي ورقة وقلم..  
بأرسم ف تكويني  
سن القلم مكسور..  
والصفحة متلخبطة..  
ولا عندي براية  
خطيت حدود السور..  
وقدرت على النطنطة..  
وخرجت برايا  
حسيت باني جسور..  
وحبالي متربطة..  
وف أيدي ميت راية  
فجأة لاقيت الرايات..  
متلونة بدم الخوات..  
معجونة ف تراب الآهات..  
والأمنيات ملهاش بريق  
ما أنا أصلي تحت بتاعة..

بأحلم بأنني جرئ  
السكة متكسرة ..  
وأنا ماشي ومصمم ..  
على الرحلة اللي وخداني  
الخطوة متقدرة ..  
ع الأرض بتعلم ..  
مغروزة في الوحلة ..  
معانداني  
وأجيب منين مقدرة ..  
أنا بس بتكلم ..  
والسكة لوسهلة ..  
أقول تاني  
أنا قلت أغير مساري ..  
وأركب لي مركب بساري ..  
أوصل لأخويا وجاري ..  
وأداوي جرح الشقيق  
ما قدرتش أمشي الطريق ..  
ما أنا أصلي حنة بتاعة ..  
بأحلم بأنني جرئ  
ورجعت حافي القدم ..  
والخطوة مسجونة ..  
في سكتها ومخنوقة

أكبر حدودي القلم ..  
والورقة معجونة ..  
ف صفتها ومزنوقة  
زادت ساعات الألم ..  
والآهه ملعونة ..  
باسكتها..  
وأقول روقه ..  
نفسي أداوي الجراح ..  
وف ليلى يشرق ..  
صباح  
والحلم يصبح ..  
مباح  
براح ..  
يا حلمي البريء  
راح من طريقي الطريق  
ما أنا أصلي تحت بتاعه  
بأحلم بأني جرى

بیت‌ایر

توب جديد..  
ملفوف ..  
على جسم الوليد  
مكتوب عليه ..  
عنوان فريد  
الفرحة جاية ..  
يا بلدنا ..  
في توب جديد  
ما اهو أصله ..  
ما يفل الحديد ..  
إلا الحديد  
بدأ الوليد ..  
يكبر ..  
ويتحضر ..  
ويركب فرسة الفرحة  
بعد الزمان ..  
ما أندار ..  
ولف له دورة  
الفارس المغوار ..  
راجع يغطي الدار ..  
ويصلح اللي انكسر ..  
ويداري كام عورة

ويبتدي مناورة ..  
تخضر أرض النيل ..  
وتخرج ..  
زرعته النادرة  
عشان ما يصبح ..  
للغلبة الصوت  
ويمد أيده ..  
في بوقهم ..  
بالقوت  
يلمهم ..  
ويضمهم ..  
ويفوت  
ويعدي بيهم ..  
من جدار القهر  
ويدوس ..  
على وش الليالي ..  
الفقر  
يلضم ..  
خيوط الفجر ..  
بالتوحيد  
ما يهموش الموت ..  
وقلبيه عنيد  
جامع ..

ملاح كل زعمائنا  
عارف ..  
وشايف ..  
كل أسمائنا  
عبد العزيز مصطفى  
ومحمدين ..  
وأحمد  
صابر ..  
وصالح ..  
وإبراهيم ..  
وأسعد  
راجع ..  
وفاتح ..  
جبهة ضد الظلم  
مرسوم ..  
على وشه الجميل..  
الحلم  
مفروش ..  
في سكة عهده ..  
حب ..  
وسلم  
لكن بعزه ..  
وعز للأوطان



وكتابه ..  
في إيديه اليمين ..  
عنوان  
بيطل ..  
من فوق الجبين ..  
وآذان  
يجمعنا صف ..  
للصلاة  
نسجد ..  
سوى سجدة نجاه  
ينصرنا ..  
بيها ربنا ..  
الله  
الله عليك ..  
ما أجملك ..  
يا ذا الوليد  
ونقول من الأول  
الثورة جاية ..  
يا بلدنا ..  
في ثوب جديد

# كلام مقلوب

كلمايا..  
وقالها لى صديقي  
قال لى أفهم..  
بس إن حقيقي..  
كل اللى بيحصل حوالينا ..  
مش بادينا  
خليك جنبى وضمن فريقى  
دور على شكلك بالراحة  
وأتكلم وبكل سماحة  
ما تجيش ف الجد وتتصدر..  
لأحسن هاتدوب جوه الراحة  
وخادتني الدنيا ف..  
مواويلها  
مش عارف أغير..  
أحوالها  
لو قلت الحق..  
أكون ظالم  
وإن قلت اللا..  
أبقى ف ذيلها  
وبأحاول أعدى على جروحي  
وأداوى بأيدي جراح روحي  
ودوايا الصدق المتخفي  
ورى صمتى الساكن..

(٣٠)

في صروحي  
صدقني يا صاحبي..  
أنا سمعتك  
وبكل ما فيه..  
أنا فهمتك  
لكن فيه شيء ..  
جوايا برئ  
بيقول يا صديقي..  
امسح صورتك  
لطريق الحق..  
سكك ودروب  
أبدأ يا صديقي..  
مالهش غروب  
لكن فتح عينك ..  
هاتشوف..  
جوه الكراسه..  
كلام مقلوب

لَا مِثْلَ حَجَرٍ

لا مش حجر ..  
بأدين صغار  
ولا دم بيروح..  
ف الهدر ..  
من غير قرار  
دي روح كفاح ..  
سكة ومسار ..  
وكلمة الحق ..  
اللي بتهد الجدار..  
وتشق قلب الليل..  
تطلع منه ..  
ميت مليون نهار  
ثوار..  
وبأدينا الحجر  
كلمة قدر..  
قالها الصغار  
لبس الشهيد ..  
ع الوسط كام قنبلة ..  
وبأيده قام شد الفتيل  
أشعل لهيب الانتظار  
فتحت..  
بيبان السما

والحور على الأبواب بتتبسم  
وأهلاً يا قمر بدر النهار  
لكنه زادت فرحته..  
يوم زفته ع الحور  
لما عرف..  
كام ذئب من جند العدو..  
ولاً غار  
الانتفاضة..  
يا شباب..  
الانتفاضة  
الانتفاضة..  
رجعت فينا السعادة  
الانتفاضة..  
سيطرت..  
يا مخضيين..  
سكة طريقكم بالدماء  
أعظم عباده..  
أه يا وليد..  
ملعونة أيد هذا الشيطان  
كلب وجبان..  
اللي أصابك ف الفؤاد  
واللي قتل أختك..

وهي ف المهاد  
حتى الولاد ..  
اللي لسانهم..  
ما نطق باسم الوطن..  
باسم البلاد ..  
صبحت جثث..  
شلناها من بين الرماد  
ملعون شارون ..  
الحقد عنده شيء غريز  
ملعون بيريز ..  
ابن الكلاب ملعونين  
غاوي السلام ..  
واديه بدم ضحايا قانا..  
غرقانين  
يا مفتونين بالهس..  
وبكتم النفس  
يا مفطومين ع الدللة..  
وسط الحرس  
يا عاشقين التنبلة..  
ونوم الونس  
أرجوكوا فوقوا..  
افهموا معنى الكفاح  
من طفل وسط دمار ونار



وكفاية عبارات الكلام  
من شجب واستنكار  
رب العباد  
خلا الولاد أبطال  
ف قلب المعركة  
صوت الحجر  
كالرعد عامل دربكة  
الطفل  
شایل  
شنطته ع الظهر  
جاي من المدرسة  
وبحبه قد الحُصّه  
يرجم شيطان الصهيونية  
بالفتره  
مش عاشق بيانات القضية  
لساه بيكتب في حروفه  
الأبجدية  
كتب القلم  
الله أكبر  
القدس عربية  
وف كل يوم ييموت شهيد  
والشنطة لسه فوق كتافه  
والنبلة في أديه الجميلة

(٣٧)

أعدائه منها والله خافوا  
متحصنين خلف..  
الطقية وبندقية  
وقنبلة..

يحضنها لما يضربوها  
ما يخاف اللي خافوا  
أرجوكوا فوقوا  
افهموا معنى السند  
لأجل الولد  
معنى الكتاف المرصوصين  
ساعة صلاة الفجر  
ودعاء القنوط  
معنى الخطوط  
نغزل خيوط الثوب  
ونرسمهم علم  
والعاصي منا يتوب  
ويعلنها في ندم  
تثبت قدم  
يكتب قلم  
على راية العرب  
اللي منداسه  
تحت أقدام الجزم

الحق  
عمره ف يوم ما تاه  
مدام  
نكون ديماً وراه  
الله علينا  
لما تتجمع أدينا  
ونرجع الحب اللي تاه  
مش قدس بس  
الي هاترجع يوم هنا  
هاتعود لنا  
كل البلاد  
وهايبتسم وش النهار  
لا مش حجر بأدين صغار  
لا مش حجر  
بأدين  
صغار

ألوان

لملمت عمري المبعثر ..  
من على الرصفان  
ورسمت بالريشة على ..  
صدر الزمن ألوان  
وف كل لون ..  
قصة وحكاية  
أحكيها من قبل البداية  
ما أنا إنسان  
عاشق تراب الأرض  
علمني أبويا الفرض ..  
وازي أكون إنسان  
من يومي بأعشق الصورة ..  
وأغرق مع الألوان  
وف كل يوم قصة ..  
وف كل يوم بصة ..  
وأنا واقف فوق المنصة  
وف ايدى ريشه ..  
بأغرزها ف عروقي ..  
وأقول لها دوقي ..  
طعم دمي الحلال ..  
ف الحال ..  
أطرطش بدمي ع اللوحة ..  
ألمحها ملووحة ..

(٤٢)

و أظبط الألوان  
وأقول لها فوقي ..  
يا نبضي وعروقي ..  
أنا ليكي رسامك ..  
فارس لأحلامك ..  
أنا شمس أيامك ..  
أرجوكي يا حلوة ..  
يا كل يوم غنوة ..  
أنا لسه زى زمان ..  
بأعشق غنا الألوان ..  
أولها كان دمي ..  
الصورة ..  
والعنوان  
والصورة والعنوان أنتي ..  
واللهي ما هنتي ..  
يا نسمة الأوطان

# مصري بسيط

ماليش في المحسوبية  
ولا ليه في التظييط  
من البيت لحد الغيط  
من الغيط لحد البيت  
مصري قوي وبسيط  
ولا بعرف في السياسة  
ولا شغل الدساسة  
أما حكاية الحداثة  
والفكرة بالتتقييط  
ماليش فيها وعمرى  
ما فهمتها ولا خبيط  
طول عمرى يا عم ماشى  
في الضلة جنب الحيط  
لا بأحب أهتف وأهلل  
ولا أقول يسقط منيل  
باكل مش ومخلل  
مصري قوي وبسيط  
لكن لو مصر نادت  
وقالت انجدوني  
فجأة تلاقني ناطط  
وثابت جندوني  
واكل وش الأعادي  
بسنانى عشان بلادى



ما أنا أصلي مصري خالص  
وما حبش الهجايص  
وأجري لو يوم تنادي  
ما يهمنيش أعيش  
فيها وما تودنيش  
ومن خيرها ما تدنيش  
أنا مش عبيط ولكن  
حبي ما بينتهيش  
علشان أنا مصري جداً  
وما أحبش أنى أمشي  
منفوش وطالع لى ريش  
ما أنا أصلي مش عبيط  
مصري لكن بسيط  
مصري بسيط عادي  
عاشق هوى بلادي  
باتمنى أشوف خيرها  
مفروش على ولادي  
طول عمرى بأحلمها  
وأنا جندي أدامها  
وسلاحي بينادي  
وبأقول يا مصر أنتي  
غنوتي وحكايتي  
وهواكي مش عادي

(٤٧)

مرسوم على جيني  
وف قلب تكويني  
حبك يا نور عيني  
موالي بينادي  
والحلم يبقى أنتي  
يا مصر يا حبيبتني

# أحزاب

أنتوا أحزاب المعارضة  
اللي قلتوا ألف لا  
وإحنا أصحاب الحكومة  
اللي قلنا ألف طظ  
تشتموننا ترفضونا  
تفضحوا رمة أبونا  
برضوا طظ  
إحنا أصلاً ..

لازقائين جوه الكراسي  
مكتوبلنا وحظنا ..  
وده شئ أساسي  
وأنتوا ..

يا أحزاب معارضة  
بطلوا وجعتوا راسي  
عزبة الأبعد أبونا  
محتاجلنا  
وانتوا ..

لسة هتقرفونا  
إحنا سايينكم في حالكم  
وأنتوا ..

سيبنوا في حالنا  
إحنا عاشقين العدالة  
بس ما تزيدش الحكاية

عن القوالة  
لحسن وحيات ..  
راس أبونا ..  
راح تجونا تشرفونا  
يوم فرحكم ع العرايس  
كرباجين حلوين ..  
وجزمة  
وحاجة شغل ..  
جوانت ناموا ..  
في الجرايس  
أصلكم مالكمش لازمة  
بطلوا معارضة وناموا ..  
في الهجايس  
إحنا عاملنكم عشاننا ..  
لجل بس تذوقونا ..  
لجل ما يشوفكم جيرانا ..  
لما يجوا يشرفونا ..  
يلقوا هيصه ..  
ولمه ياما ..  
ع الشاشات ..  
بينقدونا  
أما لما ..  
تبقوا حُمه ..

و تصدقوا وتذوقونا ..  
صدقونا ..  
راح نطلع العصايا ..  
وكرسي في كُلب ..  
الحكاية ..  
وتبقى ليلة ..  
يا عم عمدة  
ما أنتوا ..  
أحزاب المعارضة  
اللي قالت ألف لا  
وإحنا أصحاب الحكومة  
اللي قلنا ألف طظ  
لو تبظ عينين أبوكوا ..  
لحد برة  
لو صراخكم ..  
جابه لحد أمركا مرة  
مش هاتخدوا ..  
من الكراسي غير شوية  
لجل ما نظبط ..  
ونرسم في الوسية  
مش هاتخدوا ..  
من الكراسي ..  
غير صورتها

تحلموا بيها في مناكم ..  
يا خبيبتها  
وأى أحزاب ..  
ناوية تدخل من جديد  
راح ندوخ ..  
حال أبوها ..  
بقول جديد ..  
ما القانون في أدين أبونا  
أما لو راح تقرفونا  
هتلاقونا ..  
حاجة ثانية  
لحظة قول ..  
يا عم ثانية  
أيد أبونا الخطوة تنزل ..  
فوق قفاكم  
أنتوا والي قال معاكم  
هي دي كل الحكاية ..  
سمعتونا  
العبوا معانا البداية  
بس أوعوا ..  
تصدقوا وتزعلونا  
ما أنتوا ..  
أحزاب المعارضة ..

اللي قالت ألف لا  
وأحنا أصحاب الحكومة ..  
اللي قالت ألف طظ  
ترفضونا تشتمونا  
تفضحوا رمة أبونا ..  
طظ طظ وألف طظ



قُلُوبُكُمْ

افرد قلو عك..  
يا وطن..  
واسبح في بحر الحياة  
من بين ضلو عك..  
يا وطن..  
ملايين بتفرش طوق نجاه  
لاجلن ما توصل مركبك..  
ما يهمك الريح القوية  
اللي جاية من بعيد..  
ولا تغلبك  
ربط الصاري بحبال الجد  
عد الحوارى للجهاد والرد  
إيه يعني ريح..  
لا تكون جريح..  
ولا سيف صفيح..  
خليك صحيح وصريح  
وصح سكتك..  
لسانا طوع..  
لحظة أرادت عزتك  
وياك جموع تفدي..  
بحياتها ودمها  
ربك خلقها للنزال..  
ما يهمها

قول للرجال اتجمعوا ..  
ولا ترجعوا  
وإن مال زمانك يا وطن ..  
لساك شديد  
من بين حيطان الملحمة ..  
يخرج وليد  
ويعيد تاريخك من جديد  
انت اللى علمت الامم ..  
معنى الصمود  
وانت اللى بادين الجدود ..  
رسموك علي الجدارن علم  
ودليل وجود ..  
طرحت ورود ..  
من عطرها ..  
اتعطرت كل البلاد  
كل الولاد حواليك فدى ..  
لو يوم ندى صوت الكفاح  
ما يهنناش كتر الجراح  
ما يهنناش مين اللى راح  
لجل الصباح ..  
ما يهل في عيونك ضياء  
يفتح لنا باب السماء ..  
والأولياء

حوليك وفاء ..  
سيدنا الحسين ..  
والسيدة  
أهل الوفاء ..  
أهل الفداء ..  
أرضك تراث الأنبياء  
عيسى ومحمد والكليم  
أرضك عفية بنيل كريم  
بفيض بخيره ع الوجود  
واحنا الجنود ..  
عرافين حدود الملحمة  
وملايكة نازلة من السما ..  
بتمدنا بالعزم  
ما أنت الأمل والحلم  
وإن ملت ..  
دنيا الكون تميل ..  
ويطل بعد الضى ليل  
ما أنت الدليل  
وافرد قلو عك ..  
يا وطن  
واسبح في بحر الحياه  
من بين قلو عك يا وطن  
ملايين بتفرش طوق نجاه

# العمدة

من يومنا ..  
واحننا طيبين  
واخدين ..  
على ضرب القفا ..  
طول السنين  
زى ما تقول ..  
ماكتوبين ..  
على ظهر لسته مسطرة  
فيها العبط ..  
والمهبولين  
أجدادنا زرعوا الأرض بالسخرة  
طرحت ..  
سنابل قمحها بلدي  
جدي حكالي ..  
عن أبوه عسران  
كان برده راجل ..  
والرجال دي زمان  
قال يا ابن ولدي ..  
انهارده كمان ..  
زى اللي كان ..  
على عمر أبوي عسران  
العمده ..

كان ديمًا بيوعدهم ..  
بالخير ..  
وطول الحكم يسعدهم  
يفرش ..  
لهم أرض الأمل ..  
بورود  
يكتب ..  
لهم لسته ..  
وفيها وعود  
لكنهم ..  
يتفاجءو بالموعود  
العمدة ..  
يأخذ كل شئ منهم  
على رأى جدك ..  
قصدى أبوى عسران  
قبل ما يعلى ..  
كرسي عُمديته  
يكثر كلامه يا ولدي ..  
وحديثه  
ويصب ..  
خير الدنيا من بيته  
ويهد ..  
من حيطه

ويبنى ..  
في عشة الغلبان  
على رأى أبوى ..  
ابن البلد عسران  
كان هو أجمل م الملاك ..  
بزمان  
ولما الغلابة ..  
تشيله وتحبيه  
فوق كرسي عرش العزبة ..  
وبتوليه  
يبدأ كلامه الحلو ..  
ويعيد فيه  
ويعدى يومه ..  
والليالي تالية  
ولاحد يقدر يفهمه ف بيان  
على رأى أبوى ..  
ابن البلد عسران  
يرمي حمول العزبة ..  
ع الغفرا  
ويجيب مشايخ ..  
للبلد ..  
يا ولدي ما تدري  
وتحت منهم قرايب وأصحاب ..



وما أدرى  
أصل الصحاب يا ولد ..  
دول للصحاب سترة  
تخنت مشايخ بلدنا ..  
واحد وري الثاني  
والجوع ف قلب البلد ..  
بيهد من تاني  
والعمدة مهما نصرّخ ..  
ونجّض ونعاني  
لا يهمه صرخة حد ..  
ولا تاني  
لو مات ..  
أبويا وأخوي ياني  
واللى يغيظك يا ولدي ..  
قوله مع التقرير  
أنا ضد مين يفتري ..  
أنا ويا كل فقير  
بأعلن ..  
هأبيع الأرض ..  
والعزبة تبقى لفرد  
واللى هايطلع ..  
هيكون تمن تغيير  
باع الطحين والمطحنة

(٦٦)

باع الشدوف والمنحطة  
وظهر علينا وانجلي  
قال يا ولى ..  
أيامنا لسه مقتدلة  
ورجعنا من الأول كمان  
على رأى أبوى ..  
ابن البلد عسران  
وأنا اللي جاتى زرعتي ..  
يا غيطان  
كلوها يا ولدي ..  
ع طول الزمان  
على رأى أبوى ..  
ابن البلد عسران  
فتحت بلدنا الباب ..  
ع الآخر  
والعمدة قال للولاد ..  
الفقرى يتاخر  
أيام زمان ..  
الكل في الصورة  
وأجمل ما فيها الفقري والعامل

أما النهاردة..  
الرأي للفاخر  
أهلاً وسهلاً لللي جاي ..  
يشري  
يفتحله كام مندرة ..  
وبمنظرة يسرى  
يبنى ويعلى الحلو ف العزبة  
بس اللي كادنا يا ولدى ..  
واللي كان يهري  
العم فاخر ..  
قرشينه بره  
ينهب بلدنا ..  
ويرمى على بره  
وبلدنا حرة..  
يا ولدى ..  
ويا ما ف الجرة  
ويمد أيده ويستلف ..  
بضمان ..  
أرضي وبيتى وزرعتى..  
وكمان  
لو يوم سألته يقول ..  
د أنا غلبان

راحت بلدنا وضاعت ..  
العزبة  
بعد الرباط ع البطن ..  
والكربة  
بعد الليالي السوده ..  
والصعبة  
بدء الولاد من جديد ..  
يا ولدى سكتهم  
والصوت علي وانجلي ..  
ولا حد سكتهم  
علشان ما يوم الولاد ..  
نفرح بضحكتهم  
لابد غيظهم يتزرع ..  
بريحان  
يطرح أمل ومعاه عمل وإيمان  
على رأى أبوى ابن البلد عسران

شَرِيف

بيقولوا عني..  
أني شريف ..  
والله أعلم بالنسب  
وازاي أكون من نسلهم  
وأنا فيا طببا طيب العجب  
شاعر ..  
وصاحب كلمتين  
كاتب ..  
على جبين السنين  
أنا أصلي من أهل الأدب  
بعض الخلايق تبتسم  
وتقولى ايه مش راضي ليه  
دا أنت يا صاحبي..  
بكونيتك عز الطلب  
وأنا أقول لهم..  
ازاي يا ناس..  
جدي النبي ..  
بقى والنبي النسل الشريف  
بيلم أشكالى أنا ..  
وأنا فيّه ألف عيب وعيب  
قام الطبيب..  
قال يا جدع  
كل الخلايق قبلنا كانوا كده

وبرحمة الله ربنا ..  
وحبة رضا فاقوا ..  
وذاقوا الاستقامة  
أديك علامة ..  
شوف الفاروق ..  
عمر ..  
اللي فرق بيه إله الكون ..  
ما بين الحق والباطل  
كان قبل ما يقول لا إله إلا الله ..  
كان باطل  
ولما نور سيدنا النبي ..  
نور بصيرته والبدن  
قال في العن ..  
أنا كنت بأعمل ..  
عجوتى إله ..  
وأعبده  
ولما أجوع ..  
أكله يا ناس من أوله  
أرجوكوا لا تتقولوا ..  
بحكاية النسب الشريف  
المسلم الحق النظيف ..  
هو اللي يحفظ كلمته ..  
هو اللي ياكل لقمته ..

من كد ايده  
ويسبح الله ف سكته ..  
يسجد لسيده  
رب الخلايق ..  
عدل وميزانه حكيم  
واللي يسير ..  
على خط سيره المستقيم..  
يصبح شريف..  
ويعيش نظيف ..  
ويموت نظيف  
مش بالقرابة والنسب ..  
ولا بالفلوس ..  
وكنوز دهب  
اقرأ كتاب الله ..  
تبت يدى ابي لهب ..  
عم الحبيب المصطفى  
يالا العجب ..  
مش بالقرابة والنسب ..  
تصبح شريف



# کلام مو اوئل

عشقت أقول الكلام  
من أوله لآخره  
وأقول لأهل الملام  
أرجوكوا تتأخروا  
والكلمة تصحيني  
وتصحي مناماتي  
وتفتح المقفول  
وتقول حكاياتي  
مكتوب عليّ إنى  
أكون شاعر وكلماتي  
تفرش طريق الأمل  
ويّا العمل وتدوم  
وأصور المواضيع لا تضيع  
وأعمل عليها زوم مفهوم  
مفهوم يا قصدي إليّ عنده ضمير  
بأفرش طريق الخير  
وأحب أقول للغير  
حاسب على الإخلاص  
حب الحياة و الناس  
والرحمة تبقى أساس  
تطرح بساتين المحبة ف القلوب  
(٧٧)

وتدوم مفهوم  
مفهوم كلامي ولاّ مش مفهوم

وان كان ف سكة عمرنا خطوات  
مد الادين ونجمع الأخوات  
ألم الولاد وأحكى لهم الحكايات  
عشان ما يخرج من صفوفهم روح  
تفرش علينا العز مهما نروح  
وتداوي باديها الجميلة جروح  
طالت آلامنا ومن ليالي البوح  
خرجت آهات عمرنا ويلمنا المسموح  
من غنوة الحلم الجميل  
تصحى مشاعرنا  
ونعدى للمستحيل  
وياخدنا مشوارنا  
مدام نوبنا الخلاص  
والقلب فيه اخلاص  
توصل مراكب حلمنا  
على برها المقصود  
ونعود لأول مبتدى  
وأنا ف اليدى  
شاعر وعاشق كلمتى يا صحبتى  
عشقت قول الكلام من أوله لآخره

(٧٨)

لِسَانِي صَرِيحُ

لا أنا صلاح..  
ولا الأبنودي..  
ماليش في النقد والتجريح  
محمد رجب..  
وخلص

لساني صريح بقول هادي..  
وبالإحساس يا دوب عالم..  
بلا دي غنوتي وقصدي  
باقول الشعر من صغرى..  
وعارف سكتي وو عدي  
وأغرق ما بين القوافي..  
وأرض الورقة..  
وحاسس إن ده قدرى  
وقلبى الفاس والفكرة..  
واحساسى يا ناس صافى  
ولبكره ..

لا عمرى كدبت على نفسى  
ناري عشان..

يا مصر يا مناري  
ديماً راضى لضميري  
تكوني في الزمان غنوة  
ما أنا شاعر وقولى تاريخ  
نغنيها ونحكيها لأولادي

عن اللى بيجري ف بلادي  
ما أنا شاعر  
وقولى صريح  
لكن هادي

(٨٢)

# رحيل فارس

رحيل الحبيب/ فاوي الشريف

رحل الحبيب فاوي  
شيلتي هم جديد  
وكأني أنا غاوي  
للهم بالتحديد  
رغم إني مش شاعر قوي..  
زيه  
إلا إني عاشق في الصحاب.. أسمه  
شكله ورسمه  
عقله وفهمه  
ما أنا كنت فاهمه  
وكنا صحاب  
صاحب وفا وإخلاص  
بيحب كل الناس  
والشعر عنده أساس  
يكتب بكل حماس  
ما هو أصله فاوي..  
وحيد  
رحل اللي كان القلم..  
سيفه حقيقي بجد  
يفرش على صحبته..  
حبه وحنانه وود  
ويمد يد الكرم..  
زي الهرم شامخ



راكب خيول العزة ..  
وبصوت قوي صارخ  
ينده على اللي تاه  
ويروح ..  
ويجري وراه ..  
يجيبه ويوريه ..  
سكة طريق النور  
بقلب كالب نور ..  
طواف بلاد الله  
بالحب يا محلاه ..  
يجمع رفاق الطريق  
والقلب صافي وبرئ  
في الحق دائماً جري  
ورقيق في إحساسه  
عاشق تاريخ ناسه  
مفروش ..  
على جبينه ..  
زي الهلال العيد  
يا صاحبي مش هنسأك  
صورتك هنا وهناك  
أنا قلت يا محلاك ..  
شاعر حقيقي نظيف

كاتب لكن حريف  
علم بأشعاره

على كل قلب شريف  
فاوي الحبيب ..  
يا شريف

الإسماعيلية  
في ٢٧/١٠/٢٠٠٥ م  
٢٣ رمضان ١٤٢٦ هـ